

Jan de Ruijter:

E fase final y decisivo den e casonan dilanti mesa berde encuanto e Hard Rock Hotel

Mescos cu prome minister sr. Mike Eman, segun su propio palabranan, a haye dilanti di un dilema relaciona cu nos refineria, mi persona a haya mi para dilanti di e dilema di sea duna publicidad na e sentencia di Hof den mi caso contra Ministerio Publico/Otmar Oduber/Bushiri-Hard Rock, of no.

E diferencia sinembargo ta sinta den e escogencia di e dos opcionnan den ambos caso: Mike Eman mester a scoge entre interes di Pueblo di Aruba y interesnan particular.

Mi persona mester a djis dicidi si mi mester a duna publicidad di biaha na e sentencia

di dia 15 di october ultimo, of – pa respet pa Corte – warda un rato cu esaki.

Duna publicidad, of no?

Manera ta conoci, diaranzon ultimo, dia 14 di october 2015, Corte Superior na Aruba a trata mi keho contra e decision di Ministerio Publico pa pone den buki di olvido mi keho anterior contra minister di Turismo Otmar Oduber.

Despues cu e caso a tuma luga den corte, mi a tuma e decision pa no duna declaracionnan encuanto e caso; ademas mi a considera cu e asunto no tabatin necesidad di sensacion na e momento ey, pero mas bien tranquilidad y seriedad.

Awor ta den interes di comunidad Arubano, di Corte, di Ministerio Publico, y di mi mes personalmente, pa comunidad haya e informacionnan corecto encuanto e asunto di Hard Rock, y NO mita berdadnan, mentiranan, of speculacionnan inventa.

P'esey tambe mi decision pa publica e informacion aki, unda na mesun momento mi kier pidi un y tur pa no haci un sensacion di e asunto aki, pero pa duna espacio na e investigacion pa esaki por sigui su curso trankilamente.

E caso na Corte

Palabranan di compliment so mi tin pa e huesnan den Corte cu a trata e caso, tambe pa e manera cu nan a duna mi e

espacio pa mi splica mi keho a fondo, sin ningun advertencia pa pura y haci lihe, of pa tene cortico!

Despues tabatin un sesion di pregunta y contestacion, unda mi mester a contesta preguntanan di e huesnan; tabata remarcabel con lihe e huesnan tabata sa di percibi e diferencia entre asuntonan principal y asuntonan di menos importancia, y finalmente a haci pregunta tambe na e “advocaat-generaal” di Ministerio Publico cu tambe tabata presente.

E veredicto

Durante e sesion di Q. & A. a sali na cla cu e miembronan di Corte tabatin preguntanan cu tabata dificil pa e “advocaat-generaal” contesta, y cu tabata nobo pe.

Despues di un receso cortico, e ora ey mes, pues ainda durante di e caso, a bay di acuerdo cu e oferta di e “advocaat-generaal” pa cancela e “seponering” anterior, y haci un investigacion adicional relaciona cu e preguntanan specifico di Corte Superior.

Por haci pues comosifuera e caso no a tuma luga, y si mi persona no ta contento cu e investigacion, lo mi por bay bek Corte atrobe. □